

неудобь видети, нань же не смеют чини ангельстии зрети, яко же сам господь рече ко угоднику своему Моисею: «не можеша видети лица моего, не может бо человек видети лице мое и жив быти».¹ Возлюбения же ради человеком, еже да быша видяли его, сотвори си лице плотяно и претерпе волею досаждение и оплевание, и биение, и поругание, и страсть, и смерть распятия, и погребение за вся человеки, яко же сам рече ко учеником своим: «си есть заповедь моя, да любите друг друга, яко же возлюбих вы, болше сея любве никто же имат, да кто душу свою положи за други своя. Вы друзи мои есте, аще творите яко аз заповедаю Вам».² О сем же убо и верховный апостол Христов Петр наказуя ны глаголет: || «Христос пострада по нас, нам оставле образ да последуем стопам его»,³ а. 177 сиреч, аще бо умертвимся за правду. Се есть истинная любвы, еже за вся человеки умрети. Всяка бо человеческа душа оживотворится правдою. Правда же есть, еже соблюсти заповеди господня, еже есть любвы. Яко же рече возлюбленный господам богословный Иоанн: «О сем познахом любовь, яко бог по нас душу свою положи и мы должны есмы по братии душу полагати».⁴ О страхе же господь рече: «не убойтеся ото убивающих тело, душу же не могущих убити, сказаю же Вам, кого убойтеся, убойтеся имущаго власть по убиинии воврещи в дебрь огнену, ей глаголю Вас, того убойтеся».⁵ Возлюбленный же господом богословный гром глаголет: «Страха несть в любви, но совершенная любвы вон изгоняет страх, яко страх муку имат, бояйжесь не свершается в любви».⁶ Се убо слово вси верующии должны есмы внимати, да кийждо веруяи до конца стерпит. Се же убо исполниша святии апостоли, яко не убояшася прещения мук любве ради заповедей Христовых, по сих же || и сии, иже желяху по Христе мучитися. Яко же сам господь рече учеником своим: «Заповедь нову даю вам да любите друг друга, яко же возлюбих вы, да и вы любите себе. О сем разумеют вси, яко мои учиницы есте, аще любовь имате межю собою».⁷ И паки сам господь рече: «Имеяй заповеди моя и соблюдая и, той есть любяй мя, а любяй мя возлюблен будет отцем моим и аз возлюблю его и явлюся ему сам».⁸ И паки сам господь рече: «да разумеет мир, яко люблю отца и яко же заповеда мне отец, тако творю».⁹ Сие рече господь наказуя да быша верующии ему тако творили, яко же сам заповеда. И паки господь рече учеником: «яко же возлюбил мя отец и аз возлюбил вас, будите в любви моей. Аще заповеди моя соблюдете пребудите в любви моей, яко же аз заповеди отца моего соблюдох и пребываю в него любви. Сиа глаголах вам, да радость моя в вас будет».¹⁰ Се бо рече господь, || яко сам радуется о совершенней любви и паки рече: «и радость а. 177 об. ваша исполнится».¹¹ И паки рече: «Не к тому вас глаголю рабы, яко раб не весть что творит господь его, вас же ркох друзи, яко вся яже слышах ото отца моего сказах вам».¹² Того бо ради бог небесный творец ученики своя друзи нарицая, яко подая образ всем велможам смирения — еже убогих не уничижати, ни возноситися тленнаго ради и насилем собраннаго богатства, но любити тако богосозданнаго человека, яко не токмо его ради богатства тленнаго щадети, но и плоти своя его ради не пощадети, яко же сам господь плоти своя за ны не пощаде. Сего бо ради богозванный Павел к Тимофею пиша глаголет: «богатым в нынешнем веце запрещай не высокоумствовати, ни уповати на богатство гниущее, но на бога живаго».¹³ Мы бо убогаго по божию образу сотвореннаго человека ни во

¹ Исход, XXXIII, 20. ² Иоанн, XV, 12—14. ³ I Петра, II, 21. ⁴ I Иоанна, III, 16. ⁵ Матф., X, 28. ⁶ I Иоанна, IV, 18. ⁷ Иоанн, XIII, 34—35. ⁸ Иоанн, XIV, 21. ⁹ Иоанн, XIV, 31. ¹⁰ Иоанн, XV, 9—11. ¹¹ Иоанн, XV, 11. ¹² Иоанн, XV, 15. ¹³ I Тимоф., VI, 17.